

Inissiisarfimmiittussanngortitaanermik naammassinninnissap kinguartinneqarnissaanik qinnuteqaatinik suliarinnittarneq pillugu nalunaarut (kinguartitsineq pillugu nalunaarut)

Kalaallit Nunaanni pinerluttulerinermi inatsimmi § 191, imm. 4 naapertorlugu, tak.inatsit nr. 306, 30. april 2008-meersoq, aalajangersarneqarpoq:

Kapitali 1

Kinguartitsinissaq pillugu qinnuteqaat

Oqartussaaititaasut

§ 1. Inissiisarfimmiittussanngortitsilluni eqqartuussutip naammassineqarnissaanik kinguartitsinissaq pillugu qinnuteqaatit politiit suliarissavaat. Politiit aalajangiinerat Pinerluuteqarsimasunik Isumaginnittoqarfiup pisortaanut malittarisassat §§ 17 aamma 18-imiittut naapertorlugit maalaarutigineqarsinnaavoq.

Imm. 2. Eqqartuussaq saammaanneqarnissaminik tamatumunnga ilutigitillugu qinnuteqarpat Pinerluuteqarsimasunik Isumaginnittoqarfimmi pisortaq tamatuminnga aalajangiissaaq.

Imm. 3. Kinguartitsinissamik, kingusinnerusukkut saammaanneqarnissaq imaluunniit kinguartitsinissaq tamatumunnga taarsiullugu atuutilersussaq siunertaralugu, apeqquut saammaassisarneq pillugu nalunaarummi malittarisassat malillugit aalajangerneqassaaq.

Imm. 4. Kinguartitsinissamut akuersissummik utertitsinissaq pillugu apeqquutit tamarmik politiinit suliarineqassapput, taamaattoq tak. imm. 5. Politiit aalajangiinerat Pinerluuteqarsimasunik Isumaginnittoqarfiup pisortaanut malittarisassat §§ 17 aamma 18-imiittut naapertorlugit maalaarutigineqarsinnaavoq.

Imm. 5. Taamaattoq kinguartitsinissamut, kingusinnerusukkut saammaassinissaq siunertaralugu, akuersissutaagallartumik utertitsinissaq pillugu apeqquut Pinerluuteqarsimasunik Isumaginnittoqarfiup pisortaata aalajangiivigissavaa.

Kinguartitsinissamik qinnuteqarsinnaaneq

§ 2. Suliami inaarutaasumik eqqartuussuteqartoqarniariartoq eqqartuussaq, iperagaqqasoq, kinguartitsinissaq pillugu politiinut qinnuteqarsinnaavoq.

Imm. 2. Tigummigallarneqartup kinguartitsinissamik qinnuteqaataa iperagaanissaq pillugu qinnuteqaatit isigineqassaaq, suliarineqassallunilu eqqartuussisarnermik inatsisip tigummigallagaaneq pillugu malittarisassai naapertorlugit.

Imm. 3. Pineqaatissiissummik kiffaanngissusii aanertalimmik naammassinninneq aallartereersimappat, qinnuteqaat pinerluttulerinermi inatsimmi § 232 naapertorlugu naammassinninniaanerup unitsinneqarnissaanik qinnuteqaatit suliarineqassaaq.

Imm. 4. Eqqartuussiviup aalajangersimappagu eqqartuussaq, iperagaqqasoq, akiliisitsissummik ataatsimik arlalinnilluunniit akiliinissamut taarsiullugu inissiisarfimmiissasoq, tak. pinerluttulerinermi inatsimmi § 128, imm. 4, imaluunniit eqqartuussutip inissiisarfimmiittussanngortitsinertallip saniatigut aalajangiisoqarsimappat pineqartoq paarnaarussaansamut taarsiullugu inissiisarfimmut inissinneqassasoq, tak. pinerluttulerinermi inatsimmi § 256, kinguartitsinissamik qinnuteqaat pine-

qaatissiissutit inissiisarfimmiittussanngortitsinermik kinguneqartut tamaasa ilanngullugit qinnuteqaatitut isigineqassaaq.

§ 3. Qinnuteqartoq suliamik paasinarsaaqataassaaq, aamma

- 1) inuttut atukkani pillugit apersortinnermigut
- 2) nalunaarutini imaluunniit allakkatigut uppersaatinik ilanngussilluni imaluunniit kajumissaarneqarluni taakku piniqqullugit imaluunniit
- 3) akueralugu, politiit allaniit piniassagaat suliffeqarnikkut, ilinniagaqarnikkut, peqqissutsikkut imaluunniit ilaqutariinnikkut pissutsit, aalajangiinermut pingaaruteqarsinnaasut, pillugit oqaaseqaatit.

Imm. 2. Qinnuteqartup imm. 1 naapertorlugu pisussaaffik eqqutitinngippagu tamatuma kingunerisaanik paasissutissat pigineqartussat kinguartitsinissamut tunngavilersuutissatut amigartutut isigineqarsinnaapput.

Kinguartitsissutaasumik sunniut

§ 4. Eqqartuussap iperagaaqqasup qinnuteqaataa tiguneqarpat ulloq, pineqartup pineqaatissiisummik naammassinninnissamut aggersarneqarfia, kingusinnerpaamik sap. akunnerinik pingasunik sioqqullugu, naammassinninnissaq kinguartinneqassaaq suliami aalajangiisoqarnissaata tungaanut, taamaattoq tak. §§ 5 aamma 6.

§ 5. Eqqartuussaq naammassinninnissamik siornatigut kinguartitsinikuusimappat imaluunniit tamanna pillugu qinnuteqaamminik itigartinneqarsimappat, naammassinninnissaq taamaallaat kinguartinneqassaaq qinnuteqaatip nutaap suliarineqarnerata nalaani, qinnuteqaat taanna paasissutissanik pingaarutilinnik imaqaassappat.

Imm. 2. Paasissutissaq sunaluunniit, suliami siornatigut ilaanikuunngitsoq, nutaatut isigineqassaaq, kisianni paasissutissaq pingaaruteqartutut aatsaat isigineqarsinnaavoq suliamut ima pingaaruteqartigisutut isigineqarluni kinguartitsinissamik akuersissuteqarnissamut tunngavilersuutaasinnaasorineqaruni.

Imm. 3. Paasissutissat nutaat eqqortuunerat sapinngisamik uppersarneqarsimassaaq.

§ 6. Naammassinninnissaq kinguartinneqassanngilaq, eqqartuussaq inissiisarfimmi pineqaatissiisummik allamik atuippat.

§ 7. Politiit qaqutigoortumik aalajangersinnaavaat pineqaatissiisummik naammassinninnissaq qinnuteqaatip suliarineqarnerani kinguartinneqassasoq, aalajangiinerup utaqqisinneqarnissaanut piviusumik nalilersuinerup kingorna immikkut ittumik tunngavissaqartoqarpat.

Kapitali 2

Aalajangiineq

Najoqqutassat

§ 8. Aalajangiisoqassaaq pinerluttulerinermi inatsimmi § 191, imm. 1 naapertorlugu.

Imm. 2. Oqimaqatigiissaarisooqartassaaq eqqartuussap atugai inatsisinik atortitsinissamut sanilliullugit, matumunnga ilanngullugit taassuma suliffeqarnikkut, ilinniagaqarnikkut, ilaqutaqarnikkut imaluunniit peqqissutsikkut atugai.

§ 9. Piumasaqaataavoq, paasissutissat suliame pigineqartut naapertorlugit kinguartitsineq eqqartuussamut taassumalu ilaqutaanut peqqissutsip imaluunniit inooqatigiinnerup tungaatigut ajoquser-tinnissamik akornusiisinnaasutut imaluunniit annikilliliisinnaasutut ilimagineqarsinnaassasoq.

Imm. 2. Inatsisinik atortitsinissaq pissutigalugu kinguartitsinissaq aallaaviusumik illersorneqarsinnaangilaq qinnuteqartoq annertuumik pinerluuteqarsimanermut eqqartuunneqarsimappat, imaluunniit eqqartuunneqartoq nassuersimappat pinerluttulerinermi inatsimmik, aanngajaarniutit pillugit inatsimmik imaluunniit sakkut pillugit inatsimmik unioqqutitseqqissimalluni.

Imm. 3. Pineqartup inissiisarfimmiinnissaa sivisunerujartortillugu, inaarutaasumik eqqartuussuteqarnermiit piffissaq ingerlasimasoq sivisunerujartortillugu aamma kinguartitsinissaq qinnuteqaatigineqartoq sivisunerujartortillugu kinguartitsinissamik akuersissuteqarnissamut tunuarsimaarnissaq annertunerujartussaaq.

§ 10. Kinguartitsinissaq aatsaat qaqutigunnaq akuersissutigineqarsinnaavoq eqqartuussaq siu-moortumik aggersarneqassappat, malittarisassat aallartisaaneq pillugu nalunaarummi § 7, imm. 2-4-miittut naapertorlugit.

§ 11. Kinguartitsinissaq akuerineqarsinnaangilaq suliame paasissutissaqarpat, isumaqartoqartariaqarluni kinguartitsineq naammassinninngitsoortitsinerup attatiinnarneqarneranik, sakkortusarneqarneranik imaluunniit naammassinninngitsoortitseratarsinnaanermik kinguneqassasoq.

Akuersissut

§ 12. Kinguartitsinissamut akuersissut piffissamut aalajangersimasumut killilerneqarsimassaaq, nalinginnaasumik ullup aalajangersimasup, inissiisarfimmi inissaqalerfiup, kingornanut.

§ 13. Akuersissuteqartoqassappat piumasaqaatigineqassaaq eqqartuussaq pinerluuteqassanngitsoq, tak. pinerluttulerinermi inatsimmi § 191, imm. 2.

§ 14. Aammattaaq atugassarititanik allanik aalajangersaasoqarsinnaavoq, matumunnga ilanngullugu pinerluuteqarsimasunik isumaginnittoqarfimmit nakkutigineqarneq.

Imm. 2. Pinerluuteqarsimasunik Isumaginnittoqarfimmit nakkutigineqassagaanni pinerluuteqarsimasunik isumaginnittoqarfiup immikkoortortaa, eqqartuussap inissinneqarsimaffia, isumaqatigiissuteqarfigineqarsimassaaq.

Imm. 3. Kinguartitsineq eqqartuussap suliffia imaluunniit ilinniarnera eqqarsaatigalugu akuersissutigineqarsimappat, eqqartuussaq paasitinneqassaaq akuersissut suliunnaarnermi imaluunniit ilinniarunnaarnermi atorunnaassasoq.

§ 15. Kinguartitsinissamut akuersissut allakkatigut nalunaarutigineqassaaq, nalinginnaasumik pineqartup nalunaarfigineqarneratigut.

Imm. 2. Nalunaarutiginninneq politiit isumagissavaat, taamaattoq tak. imm. 3.

Imm. 3. Pinerluuteqarsimasunik Isumaginnittoqarfimmit nakkutigisaanissaq aalajangersarneqarsimappat, akuersissut immikkoortortaqarfimmit nakkutiginnittussaasumit nalunaarutigineqassaaq.

Qinnuteqaatit, tamakkiisumik akuerineqanngitsut

§ 16. Aalajangiineq sunaluunniit, tassani qinnuteqaat tamakkiisumik akuerineqarsimanani, allakkatigut nalunaarutigineqassaaq aamma Pinerluuteqarsimasunik Isumaginnittoqarfiup pisortaanut

maalaartoqarsinnaaneq pillugu malittarisassallu §§ 17 aamma 18-imiittut pillugit ilitsersuummik imaqassaaq.

Imm. 2. Aalajangiineq akuersissutitaqarpat, massa qinnuteqaat tamakkiisumik akuerineqanngikka-luortoq, malittarisassat §§ 12-15-imiittut atorneqassapput.

Imm. 3. Kinguartitsinissaq itigartitsissutigineqarpat, aalajangiinerup pineqartumut nalunaarutigi-neqarnissaa politiit isumagissavaat. Aalajangiinerli pineqartup inunnik nalunaarsuisarfimmi adres-sianut imaluunniit sumiiffianut ilisimaneqartumut nassiunneqarsinnaavoq, eqqartuussaq pineqaatis-siissummik naammassinninnissamut suli aggersarneqarsimangippat.

§ 17. Eqqartuussap aalajangiineq, qinnuteqaammik tamakkiisumik akuersinertaqanngitsaq, maa-laarutigisinnaavaa maalaarut politiinut imaluunniit Pinerluuteqarsimasunik Isumaginnittoqarfiup pisortaanut nassiullugu imaluunniit tunniullugu.

§ 18. Politiit aalajangiissutaata eqqartuussamut nalunaarutigineqarneraniit kingusinnerpaamik ullut 8-t qaangiunneranni maalaarut tiguneqarsimappat, naammassinninnissaq Pinerluuteqarsimasunik Isumaginnittoqarfiup pisortaata suliama aalajangiinissaata tungaanut suli kinguartinneqassaaq. Piu-masaqaataavoq naammassinninnissaq malittarisassat §§ 4-7-imiittut naapertorlugit tamanna tikillu-gu kinguartinneqarsimassasoq.

Kapitali 3

Kinguartitsinissamut akuersissummik utertitsineq

Utertitsineq pillugu paasissutissat naliginnaat

§ 19. Politiit, pisut § 1, imm. 5-imi pineqartut eqqaassanngikkaanni, kinguartitsinermut akuersis-summik utertitsisinnaapput,

- 1) eqqartuussaq atugassarititaasunik, kinguartitsinermik akuersissuteqarnermi aalajangersarne-qarsimasunik, malinninngippat imaluunniit
- 2) eqqartuussaq akuersissut nalunaarutigineqartoq sioqqullugu pinerluuteqaqqissimasoq pillu-gu paasissutissanik nutaanik takuttoqarpat.

§ 20. Utertitsineq allakkatigut nalunaarutigineqassaaq aamma Pinerluuteqarsimasunik Isumagin-nittoqarfiup pisortaanut maalaaruteqarsinnaaneq pillugu ilitsersuummik imaqassaaq, tak. § 24.

Imm. 2. Aalajangiineq politiit isumagisaannik pineqartumut nalunaarutigineqassaaq.

Utertitsinermi pissutsit assigiinningsut il.il.

Pinerluuteqaqqinneq pissutigalugu utertitsineq il.il.

§ 21. Pinerluuteqaqqinneq pissutigalugu akuersissummik utertitsinermi politiit nalunaarutigisin-naavaat kinguartitsinissamut akuersissut atorunnaarsinneqartoq.

Imm. 2. Eqqartuussaq pinerluuteqaqqippat akuersissummik utertitsisinnaaneq pillugu aalajangiiso-qassaaq aallaavigineqarluni inatsisinik atuutsitsinissaq pissutigalugu akuersissummik utertitsinissaq pisariaqartoq, taamaattoqassananili pinerluuteqarsimasup peqqissusaanik imaluunniit ilaqutaanik soqutiginninneq piviusorsioortumik naliliinerup kingorna annertoorujussuarmik pingaartinneqarta-riaqarpat.

Paasissutissat nutaat tunngavigalugit akuersissummik utertitsineq

§ 22. Kinguartitsinerup nalaani paasissutissanik nutaanik takkuttoqarpat eqqartuussaq akuersissut nalunaarutigineqartoq sioqqullugu pinerloqqissimasoq pillugu, akuersissummik utertitsinnaaneq pillugu aalajangiisoqassaaq pivusorsiortumik nalileeqqinneq tunngavigalugu, tak. §§ 8-11.

Atugassarititanik unioqqutitsineq pissutigalugu akuersissummik utertitsineq

§ 23. Eqqartuussap kinguartitsinermut atugassarititat unioqqutippagit akuersissut utertinneqassaaq, pivusorsiortumik nalilersueqqinnermi, tak. §§ 8-11, kinguartitsinissamut akuersissut naammattumik tunngavissaqartinneqanngippat.

Kapitali 4

Maalaaruteqarsinnaaneq

§ 24. Eqqartuussap politiit akuersissummik utertitsinissamik aalajangiinerat maalaarutigisinnavaa, maalaarut politiinut, paaqqinniffimmut imaluunniit Pinerluuteqarsimasunik Isumaginnittoqarfiup pisortaanut nassiullugu imaluunniit tunniullugu.

Imm. 2. Pinerluuteqarsimasunik Isumaginnittoqarfiup pisortaata aalajangissavaa, naammassinninnissaq maalaarutip suliarineqarnerata nalaani kinguartinneqassanersoq.

Kapitali 5

Atortuulersitsineq

§ 25. Nalunaarut atortuulerpoq ulloq 1. januar 2010.

Kalaallit Nunaanni Pinerluuteqarsimasunik Isumaginnittoqarfik, ulloq 7. december 2009

THOMAS NICOLAJSSEN